

LE BULU'INĒ' DIOS JUAN

Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bë'ë Lë' lataj Dios ulu'inë' yugu' huen dxin queë' ca naca le run bayudxi ilácatë. Jesucristo gusöl-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'inë' neda' ca naca lë ni. ² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zë nágagaca nu na' ulaba xtídzë'ë Dios ni, en ilún ca rna lë ni nazúaj lu guichi, tu' chizóa gaca.

Juan ruzúajë' le uzéajni'i gadxi cö' bönachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá láchë'ë queëli', en gunë' ga cö'ö dxi icja láchxi'do'oli', ate' dzágagaca gadxibö' Lë' nacua' lahuë' Lë' ga ni' rö'ë rinná bë'ë.

⁵ Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' hubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxí'inë' rë'u, en gudibë' rë'u, tu' bugüë' dul-la' nabága'ru' len xichönë' le bulaljë'

lè'e yaga cruz, cate' gútië' uláz queëru'. ⁶ Jesucristo benë' ga rinná bē'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatíca'sö queë' yöl-la' unná bē'! ¡Ca' gaca!

⁷ ¡Buli'yútsöca'! ¡Zë'ë Cristo lu böaj lúzxiba! ¡ila'lé'e Lë' yúgu'të bönachi, enca' nupa ni' gulún Lë' huë', en bëtigaca Lë'! ¡ila'bödxi yechi' yúgu'të bönachi yödzölió ni cate' ila'lé'e Lë'! ¡La'tu' gácatë caní! ¡Ca' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóaticasë', en sí' ulé'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxön riguí'i rizáca'léna' libí'ili', en tsözxön len libí'ili' ruzi'a xibé le rinná bē'ë Dios, en nadéli'da' yöl-la' riböza zxön ladxi' na' runnë' Jesucristo queëru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo.

¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyön chi'ë ca ribödxi lúzuba' böa' bëdxi. ¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusöl-la' le quéguequi gadxi cö' bönachi quia' nacuá' luyú Asia, nupa nacuá':

Lu yödzö Éfeso,
lu yödzö Esmirna,

lu yödzö Pérgamo,
 lu yödzö Tiatira,
 lu yödzö Sardis,
 lu yödzö Filadelfia,
 lu yödzö Laodicea.”

¹² Buécja’ para ilé’eda’ Bönni’ na’ rulidzë’ neda’. Cate’ buécja’, bilé’eda’ gadxi le nuá’gaca guí’ le néquiquequini oro. ¹³ Ladaj gadxi le nuá’gaca guí’ na’ bilé’eda’ tu Bönni’ riné’ë ca tu bönni’. Nácuë’ tu lari’ tunna le ridxín xini’ë, en luchu’ë nasíë’ tu le néquini oro. ¹⁴ Chiguíchido’os naca guitsa’ icjë’ ca naca zxila’ o ca riná’ bögui’, ate’ rëpi yösa bení’ guió’j lahuë’ ca guí’. ¹⁵ Rëpi yösa bení’ ni’ë ca guíë bronze dxíldo’, le nudzé’eda’ lu guí’ ca bo’ yalaj. Zidzaj biyön chi’ë ca riyön tu yegu zxön. ¹⁶ Lu në’ë ibëla zxóagacaba’ gadxi böljaj bení’, ate’ rirúaj didza’ ru’ë le naca ca tu guíë tuchi’ natuchi’ iropa la’a. Rëpi yösa bení’ lahuë’ ca gubidza cate’ rudzá’a.

¹⁷ Cate’ bilé’eda’ Lë’ gudzö’a xini’ë ca tu bönni’ nati. Ní’irö Lë’ guxóa në’ë neda’ len në’ë ibëla, en gudxë’ neda’: “Biti’ gádxinu’. Neda’ naca’ Bönni’ zoë’ zí’alö, en röjsétië’.” ¹⁸ Naca’ Nu nabán caz. Gútiá’, ate’ na’a zóaticá’sa’ nabana’. Dë lu na’a inná bé’eda’ yöl-la’ guti, en lataj ga nacuá’ nupa nátigaca. ¹⁹ Buzúaj lu guichi lë na’ chibilé’enu’, en le raca na’a, enca’ le ral-la’ gaca tödi na’a. ²⁰ Lë ni naca le nagachi’ ca naca quégacaba’ gadxi böljaj bení’ na’ bilé’enu’ zxóagacaba’ lu na’a ibëla, en ca naca gadxi le nuá’gaca guí’ le néquiquequini oro. Gadxi böljaj bení’ na’ sa’yéajgacaba’ gadxi gubáz quégaca gadxi cö’ bönachi quia’, ate’ gadxi le nuá’gaca guí’ na’ sa’yéajgaca gadxi cö’ bönachi quia’ na’.”

2

Didza' gusöl-lë'ë yödzö Éfeso

¹ Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi böljaj bení' lu në'ë ibëla, en ridë' gatsaj láchui'lö gadxi le nuágaca guí' na' néquiguequini oro. ² Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxí' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'. ³ Ribözali' zxön ladxi', en chigudí'i guzxacá'li' tu' dá'ali' neda', pero biti' gu-cuidí' ládxi'li'. ⁴ Na'a, dë tu le ruzegui libí'ili' didza': Bítí'rö nadxí'ili' neda' ca na' bidxí'ili' neda' zí'alö. ⁵ Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i ládxi'li', en guli'gún ca na' benli' zí'alö. Channö cabí ubí'i ládxi'li', guídatia' queëli', ate' ugúa' le nuá' guí' queëli' xilataj. ⁶ Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj ládxi'gaca budó' guiöj budó' yaga, en tun le ruá' dö', lë na' lësca' biti' rilé'eda' dxi'a. ⁷ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láchui'lö luyú lachi queë' Dios, le gun ga ila'cuá'tica'sö nabán."

Didza' gusöl-lë'ë yödzö Esmirna

⁸ Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia'

lu yödzo Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. ⁹ Caní rnníá': Neda' nöz quézida' le runli', en ca riguí'i rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni' ta'nná nácacaca bönachi judío, pero biti' ca' nácacaca caní. Nupa ni ta'dá' Satanás, tu' xihui'. ¹⁰ Biti' ca' gádxili' le ral-la' quí'i sáca'li'. Tu' xihui' na' gun ga idzunli' bál-lali' libí'ili' lidxi guíë. Caní si' bë' libí'ili', ate' quí'i sáca'li' idú ca chi dza. Guli'tséajlë' neda' ga idx-intë dza gátili', ate' neda' gunna' yöl-la' na'bán idú queëli'. ¹¹ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí gabila."

Didza' gusöl-lë'ë yödzö Pérgamo

¹² Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guíë tuchi' na' natuchi' iropa la'a. ¹³ Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'. ¹⁴ Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzö Pérgamo, nazí lu

ně'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu'böa' bédxido' gulútigaquië'-ba' lógaca budó' guiöj budó' yaga, en gulunë' le ruá' dö'. ¹⁵ Lësca' caní nacué'len libí'ili' nupa ni' nazí' lu ně'eguequi xibá quégaca bönachi nicolaíta, lë na' bití' rilé'eda' neda' dxi'a. ¹⁶ Que lë ni na', buli'bí'i ládxi'li' na'a. Channö cabí ubí'i ládxi'li', guídatea' ga zóali', en tíl-lalena' légaquië' len didza' rirúaj ruá'a, le naca ca tu guíë tuchi'. ¹⁷ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cuntu nu nunbë' le, pero núpasö na' ila'zí'i le, ilúnbë'e la na'."

Didza' gusöl-lë'ë yödzö Tiatira

¹⁸ Gunnë' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácagaca ca guí', ate' ni'ë nácagaca ca guíë bronze dxí'ido'. ¹⁹ Caní rnnë': Neda' nöz quézida' le runli'. Nözda' ca nadxí'ili' neda', en ca réajlé'ëli' neda'. Nözda' ca' ca runli' xichina' lu yöl-la' riböza zxön ladxi' queéli'. Nözda' nácáro idú ca runli' yugu' lë ni ca benli' zí'alö. ²⁰ Nacué' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizi' yé'enu bönni' tunë' xichina'. Rusédinu légaquië' le run ga

tunë' le ruá' dö', en tahuë'-ba' böa' bédxido' ta'gu'ë légacaba' lógaca budó' guió'j budó' yaga. ²¹ Neda' bé'a-nu lataj ubí'i ládxi'nu, pero biti' ré'ëninu ucá'ananu le ruá' dö' na' runnu. ²² Que lë ni na' chú'una'-nu tu le gáti'nu ga na' quí'i sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'. ²³ Guna' ga ilátibi' xzí'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queéli' tsca naca le runli'. ²⁴ Ia'zícá'li' zóali' yödzo Tiatira, núlöli' biti' nazi' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. ²⁵ Na'a, lë na' chinazí' lu ná'ali', guli'gún chi'i ga idxintë dza huöda'. ²⁶ Bönni' ni' ila'déli'në' lu le raca yödzölió, en ilunë' ca ré'ënda' neda' ga údxitë, neda' guna' ga ila'nná bé'enë' bönachi idútë yödzölió. ²⁷ Ca na' budödë' Xuza' Dios yöl-la' unná bé' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquië' tu xiyaga guié, ate' ulu'zxuzxjë' bönachi na' ca nu ruzxuzxaj zxiga' yö'öna néquini yu. ²⁸ Gu'a ca' le naca ca bölj hui sila quégaquië'. ²⁹ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

3

Didza' gusöl-lë'ë yödzö Sardis

¹ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bölaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'.
² Buli'subán ládxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' bití' naca idú tsahui' lahuë' Dios. ³ Guli'tsöjné na'a xibá na' biyönili' le guzxi' lu ná'ali'. Guli'gún ca rRNA xtídzë'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en bití' inözili' bizxi dza na' guída' ga zóali'.
⁴ Nacuá'len balla bönachi libí'ili' lu yödzö Sardis, nupa bití' nácagaca xihui'. Ila'dalen nupa ni neda', nácugaca lari' chiguíchido'os le ruluí'i nuhuóácagaca idú tsahui', en nácagaca lesaca' gaca caní quéguequi.
⁵ Nupa ila'deli' lu le raca yödzölió ugácuá' léguequi lari' chiguíchido'os, en bití' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'.
⁶ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzö Filadelfia

⁷ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza'

idútë li, en dë lu në'ë zxfí'ini guíë queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntú nu gaca usayaj le, en rusayjë' ga nu riyaza, ate' cuntú nu gaca isalaj le. ⁸ Bönni' ni rnnë': Neda' nöz quézida' le runli'. Nözda' náпали' láti'do'os yöl-la' huáca, pero runli' ca rnna xtídza'a, en biti' rutuí'ili' rnnali' néquili' quia'. Que lë ni na' nuzó'a' loli' tu ga nu tsaz le nay-alaj, ate' cuntú nu gaca usayaj le. ⁹ Buli'yútsöca', ta'dë' bönni' ni' Satanás, tu' xihui', en ta'zì' yë'ë, ta'nnë' nácagaquië' bönachi judío ta'yéaj láchxí'gaca Dios, pero biti' nácagaquië' caní, guna' ga ila'dxinë' loli', en ulu'zechu zxfíbigaquië' xiní'ali'. Ní'irö iléquibe'enë' nadxí'ida' libí'ili'. ¹⁰ Tu' benli' ca rnna xtídza'a, en gulözali' zxon ladxi', gun chí'a libí'ili' dza na' ila'guí'i ila'zaca' yúgu'të bönachi lu yödzülió ni, lë na' gaca para si' bë' léguequi. ¹¹ ¡Si' guída'! Que lë ni na' guli'gún chí'i le náпали', para cabí gaca nu gun ga cabí sí'ili' lë na' ral-la' gunna' queéli'. ¹² Núlöli' ni' idéla'li' lu le raca yödzülió, neda' guna' ga gácali' tsutsu ca nácagaca ya'zxön, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë Dios quia', enca' ca lë yödzü queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi. ¹³ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzü Laodicea

¹⁴ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzü Laodicea. Caní uzúaju' lu guichi: Ru'ë

didza' Bönni' na' zoë' tsaz, Bönni' runë' ca rnnë', en ru'ë didza' idütë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios. ¹⁵ Caní rnnë': Neda' nöz quézida' le runli'. Ca runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládxi'li'. Dxi'arö gaca la' gácali' ca nisa ziaga o ca nisa zögui'. ¹⁶ Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuëbi nisa nati yula na'. ¹⁷ Libí'ili' rnnali' rilé'eli' yöl-la' tsahui' queëli', en raca dxi'a queëli', en biti' bi riyadzaj queëli', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö! ¹⁸ Que lë ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queëli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queëli' le run ga nu rutuíi. Ral-la' gá'uli' ca' quia' le gun ga ulu'huöáca guiöj loli' para gaca ilé'eli' le naca quia'. ¹⁹ Neda' ruzeda' bach, en run zi'a yúgu'të nupa nadxí'ida' channö cabí tun le naca dxi'a. Que lë ni na', buli'bí'i ládxi'li', en guli'gún xichina' idú ládxi'li'. ²⁰ Buli'yútsöca', neda' caz zuína' ga nu riyaza, en rulidza'. Channö nútítës nu yöni chi'a, en isalaj quia', tsázia', en gágulena' nu na', ate' nu na' gágulen neda'. ²¹ Núlöli' idéli'li' lu le raca yödzülió, neda' guna' ga cö'öli' tsözxön len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' gurö'lena' Xuza' tsözxön ga na' rö'ë rinná bë'ë.

22 Nu riyöni, ral-la' uzě nagui lě ni rnně' Dios Bö' Lá'ayi, ru'ileně' didza' yugu' cö' bönachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lě ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ě bönni' na' biyönda' zí'alö, ate' bulidza zidzaj ca ribödxí lúzuba' böa' bēdxí. Chi'i ni bulidza neda', gunná: "Gudá xitsá'alö ni, ate' neda' uluí'ida' li' le run bayudxi ilaca tōdi ni."

² La' ní'sö guzóaleně' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bē', en bilé'eda' ca' Nu na' rö'ö lataj na'. ³ Rēpi yōsa bení' Nu na' rö'ö lataj na', ca na' rēpi yōsa bení' guiōj jaspe, en guiōj cornalina, yugu' guiōj nazáca'da'. Idú gásibi'ilö lataj na' zoa biguita' le naca lachi ca naca guiōj esmeralda, le rēpida' yōsa bení'. ⁴ Idú gásibi'ilö lataj na' nacué' ca' ia'tapa uruá' lataj gapa ta'bö' nupa ta'nná bē', ate' yugu' lataj na' ró'ogaquiē' tapa uru'ē bönni' gula, nácugaquiē' lari' chiguíchido'os, en dxíagaca ícagaquiē' le néquiquequini oro. ⁵ Ta'ruáj yōsa, en guziú' rinně lu lataj lo ga ni' rö'ö Nu na', ate' bö zxon ru'u. Lahui' lo lataj na' tu'zení' gadxi le ta'gú'u bení', le nácagaca gadxi bö' dzágagaca Dios. ⁶ Ca dōdilö lahui lataj ni dē tu ca naca tu nísado' le rēpi yōsa bení' ca guiōj jara.

Nacué' tapa nupa nabángaca cuiti lataj na', tsölá'a huéaj, ate' zían guiōj lógaca dxíagaca zaca' cūdzi'löguequi, en láhuilöguequi. ⁷ Tu nu nutsa'

ladaj tapa ni nalá' ca nácaba' bēdxi guixi'. Nu na' buropi nalá' ca nácaba' bēdxi, ate' nu na' bunni nalá' lahui ca naca lo bōnni', ate' nu budapi nalá' ca nácaba' bisiá' ruzuba'. ⁸ Idápatē nupa ni, nacuá' xopa xíligaca que queēguequi, ate' idá'alōguequi, en lē'elōguequi xíliguequi dxíada'gaca zían guiōj lōguequi. Rēla, en te ža bití' ta'cuá' dxisō, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yōl-la' huáca!

¡Guzóa cazē' Lē', en zoa cazē', en chizóa ulē'!

⁹ Nupa na' nabángaca ta'gú'u yōl-la' ba Nu na' rō'ō rinná bē', en zóatica'sō nabán. Tun bal Nu na', en tē Nu na': "Xclenu'." Bátatitēs tun idapa na' caní, ¹⁰ tu'tsaga lógaca tapa uru'ē bōnni' gula na' lu yu lahui' lo Nu na', en ta'yéaj lādxi'gaca Nu na' zóatica'sō, en tu'cu'ē le néquiguequini oro dxía ícjagaquiē' lahui' lo lataj ga ni' rō'ō rinná bē' Nu na', ta'nné':

¹¹ ¡Xantu' Dios, nacu' lesaca'

cú'utu' Li' yōl-la' ba, en guntu' Li' bal,

en gata' quiu' yōl-la' unná bē' tu' benu' yúgu'tē le dē!

¡Ca rē'ēni quézinu' nacuá', en gula'sí lo nacuá'!

5

Tu guichi, en Bōnni' náquiē' Bō'cu' Zxíla'do'

¹ Ní'irō bilé'eda' tu guichi lu na' ibēla Nu na' rō'ō lataj lo. Guichi na' naca tu guichi nudubi, en dá'gaca didza' lē'elō, en láhuilō. Naguela' guichi na' gadxi le nusáyajgaca le. ² Bilé'eda'-nē' tuē' gubáz lá'ayi lo, ate' bē'ē zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. ⁴ Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. ⁵ Ní'irö tuë' bönni' gula ni' gudxë' neda', gunnë': "Biti' cödxu'. Bönni' na' náquië' ca bëdxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidéli'në' lu yúgu'të le raca, en séqui'në' uládu'ë le naguéla'gaca guichi ni, en usálajë' le."

⁶ Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxië' huë' ca naca que tu bö'cu' zxíla' zoa nu bëti lëba' lahuë' Dios, nacuá' gadxi lúzuba', en gadxi guiöj loba', le tu'luí' ca nácagaca gadxi bö' na' dzágagaca Dios, nasöl-lë'ë léguequi idútë yödzölió. ⁷ Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. ⁸ Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' ruluí' yöl-la' rulidza Dios quégaca bönachi queë'. ⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quél'u guichi na',
 en uládu'u le naguéla'gaca le,
 tu' bë'u lataj yugu' bönni' gulútië' Li',

ate' len xichönu' böá'uu' bönachi para ilequi queë'
Dios,

nupa nátagaca bönachi izá'a nacuá' idútë yödzölió,
bönachi tuí'i yúgu'të didza' yúbölö,
en nabátagaca yúgu'të yödzö,
en yúgu'të luyú nacuá' idútë yödzölió.

¹⁰ Benu' ga nátagaquië' bönni' ta'nná bë'ë
en ga nátagaquië' bixúz queë' Dios queëru'.
Benu' ga ta'nná bë'ë lu yu yödzölió.

¹¹ Ní'irö buyúa', en biyönda' chí'igaquië' gubáz
lá'ayi zían. Zían gáyu'ë, en gáyu'ë nacu'ë. Nacu'ë
idú gásibi'ilö lataj lo na' tsözxön len nupa na'
nabángaca, enca' yugu' bönni' gula na'. ¹² Tu'ë
zidzaj didza' yúgu'të', ta'nnë':

¡Bönni' na' náquië' Bö'cu' Zxíla'do' gulútië',
náquië' lesaca' gata' yöl-la' unná bë' lu në'ë,
en yöl-la' tsahui', en yöl-la' réajni'i, en yöl-la' huáca!
¡Náquië' lesaca' gunru'-në' bal, en tseaj ládxi'ru' Lë',
en cú'uru'-në' yöl-la' ba!

¹³ Ní'irö biyönda' tul-la yúgu'të le benë' Dios
yehua' yubá, en lu yu yödzölió, en zxánilö luyú, en
lu nísado'. Tul-la yúgu'të le nacuá' yugu' lataj na',
ta'nná:

¡Yöl-la' ba Nu na' rö'ö lataj lo,
enca' Bönni' na' náquië' Bö'cu' Zxíla'do'!
¡Gúntica'siru'-në' bal
en cú'utica'siru'-në' yöl-la' ba,
ate' inná bë'tica'së' Lë'!

¹⁴ Idápatë nupa na' nabángaca ta'nná: "¡Ca' gaca!"

Ní'irö idapa uru'ë bönni' gula na' bulu'tsaga
lógaquië' lu yu, en gula'yéaj ládxi'gaquië' Nu na'
zóatica'sö.

6

Yugu' le naguéla'gaca guichi

¹ Ní'irö bilé'eda'-në' Bönni' náquië' Bö'cu' Zxíla'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chi'i ca guziú' rinnë, gunná: “¡Gudá uyú!”

² Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácatërö lo para idéli'në' lu gudil-la.

³ Cate' buládzu'ë le buropi le naguela' guichi na', biyönda' nu buropi na' nabán, ate' gunná: “¡Gudá uyú!”

⁴ Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzë'eguequi. Bulu'nödzjë' queë' tu guié' tuchi' zxön.

⁵ Cate' buládzu'ë le bunni le naguela' guichi na', biyönda' nu bunni na' nabán, ate' gunná: “¡Gudá uyú!”

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxigóns. ⁶ Biyönda' ruíi didza' tu chi'i gatsaj láhui'lö tapa na' nabángaca, ate' gunná: “Chopa guié' zxoá' xtila len lazxaj que tu dza huen dxin tu' gaca gubín, en xopa guié' zxoá' cebada len lazxaj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la.”

⁷ Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: "¡Gudá uyú'!"

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guíë tuchi', en len yöl-la' ridún, en len yugu' yödzöhué', en len yugu' böa' guixi' sínia' dzö'öba' luyú.

⁹ Cate' buládzu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtidzë'ë Dios, en tu' gulunë' ba nalí queë'.

¹⁰ Guluí'i zidzaj didza' yugu' bö' ni, gula'nná: "¡Xan-tu' Lá'ayi, runu' ca rnno'! ¿Bátaxi caz uchi'a usöröu' queëtu', en uzí'i lëbu' yugu' bönni' nacu'ë yödzölió tu' gulútië' netu'?"

¹¹ Bulu'nödzjë' quéguequi yugu' lari' chiguíchido'os ilácuë', en gulé' léguequi: "Ral-la' uzí' ládxi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'ili'."

¹² Cate' buládzu'ë le buzzopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön.

¹³ Gula'guínnaj böljaj lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'. ¹⁴ Gudödi que lúzxiba, ate' guca que ca raca que tu guichí cate' nu rutubi le.

Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. ¹⁵ Ní'irö yugu' bönni' ta'nná bē'ē luyú, en yugu' bönni' lo, en yugu' bönni' ta'lé'enē' yöl-la' tsahui', en yugu' bönni' ta'nná bé'enē' bönni' röjáquiē' gudil-la, en yugu' bönni' dē lu ná'agaquiē', en yúgu'të nupa nadó'ogaca, en yúgu'të nupa bití' nadó'ogaca bulu'cachi' lógaquiē' gapa naca zxañ bulóaj, en gapa naca lē'e guiöj lu guí'ado'. ¹⁶ Gulē' yugu' guí'ado' na', en yugu' lē'e guiöj na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queē' Bönni' na' náquiē' Bö'cu' Zxíla'do' netu'. ¹⁷ Chibidxín dza uluí'i lahui yöl-la' rilé quegaquiē', ate' ¿nuzxi caz sequi' guá' ilén le?"

7

Tu gayuá' yu' tapa-un milē' bönni'

¹ Gudödi gulaca yugu' lē ni bilé'eda' tapa gubáz lá'ayi zuíguequinē' idapa la'a yödzölió. Tu'záguē'ē xinözgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. ² Bilé'eda' ca' ia'tué' gubáz lá'ayi zē'ē rirúajē' ga rilén gubidza. Nu'ē tu le udē'ē nupa náca gaca queē' Dios ban le gaca bē' léguequi. Bē'ē zidzaj didza', en bulidzē' idapē' gubáz lá'ayi ni' nadödi lu ná'agaquiē' yöl-la' huáca unná bē' ilún dítjanē' luyú, en nísado'. ³ Gudxē' légaquiē': "Bití' gun dítjali' luyú, en nísado', en yugu' yaga cate' udá'arötu' tu le gaca bē' ra' xigágaquiē' bönni' huen dxin queē' Dios queēru'."

⁴ Biyönda' tsca náca gacaquiē' bönni' da' légaquiē' lē na' naca bē'. Náca gacaquiē' idú tu gayuá' yu' tapa-un

milë' ladaj yúgu'të cö' zxí'ini xi'sóë' Israel. ⁵ Yugu' bönni' na' da' légaquië' lë na' naca bë' nácagaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.

⁶ Chinnu milë' di'a dza queë' Aser.

Chinnu milë' di'a dza queë' Neftalí.

Chinnu milë' di'a dza queë' Manasés.

⁷ Chinnu milë' di'a dza queë' Leví.

Chinnu milë' di'a dza queë' Isacar.

⁸ Chinnu milë' di'a dza queë' Zabulón.

Chinnu milë' di'a dza queë' José.

Chinnu milë' di'a dza queë' Benjamín.

Bönachi guizxi yu nácugaca lari' chiguíchido'os

⁹ Gudödi guca lë ni buyúa', en bilé'egacada' bönachi zían, cuntu nu gaca ulaba léguequi. Nabábagaquië' yúgu'të yödzö tu'í didza' yúbölö idútë yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zöngaquië' zin. ¹⁰ Tu'ë zidzaj didza' yúgu'të, ta'nnë':

¡Yöl-la' rusölá za' lu në'ë Dios queëru', rö'ë lataj lo ni,

en za' ca' lu në'ë Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dödilö lahui lataj lo na', en ta'yéaj ládxi'gaquië' Dios,

¹² ta'nnë':

¡Ca' gaca! ¡Yöl-la' ba Li', Dios queëtu'!

¡Napu' yöl-la' zxön, en yöl-la' réajni'í!

¡Rëtu' Li': "Xclenu", en runtu' Li' bal!
 ¡Napu' yöl-la' unná bē', en yöl-la' huáca!
 ¡Gácatíca'sö caní quiu', Dios queëtu'!
 ¡Ca' gaca!

¹³ Ní'irö gunábinë' neda' tuë' bönni' gula na',
 gunné': "¿Nupxi na' nácugaca lari' chiguíchido'os, en
 gapxi bönni' légaquië'?"

¹⁴ Neda' gudxa' lë': "Xan, li' nöz quézinu'."

Lë' gudxë' neda': "Nupa ni gula'guíi
 gula'záca'da'. Gula'guíbë' lari' nácugaquië', en
 bulu'ún léguequi chiguíchido'os len xichönë' Bönni'
 na' náquië' Bö'cu' Zxíla'do'. ¹⁵ Que lë' ni na' nacu'ë
 ca dödilö lahui lataj lo ga rö'ë rinná bē'ë Dios,
 en tunë' dxin lahuë' Lë' rëla, en tē dza lu yudo'
 queë'. Nu na' rö'ö lataj lo ni gun chi'i légaquië' tu'
 zóaléntica'sö légaquië'. ¹⁶ Bítí'rö ila'dunë', en bítí'rö
 ila'bidxë' nisa, en bítí'rö ila'yéguinë' gubidza, en
 bítí'rö iléquinë' xilá ¹⁷ tu' uyúë' Bönni' na' náquië'
 Bö'cu' Zxíla'do' légaquië' ca nu uyú bö'cu' zxíla'.
 Zoë' gatsaj láhui'lö lataj lo na'. Ichë'ë légaquië' gapa
 ralaj nisa le ruíi yöl-la' na'bán, ate' Dios uzxië'
 lógaquië' nisa ta'bödxë'."

8

Le igadxi le naguela' guichi

¹ Cate' buládu'ë le igadxi le naguela' guichi
 na', gurö'ö dxi yehua' yubá idú gatsaj hora.
² Ní'irö bilé'egacada'-në' gadxi gubáz lá'ayi
 na' zuíguequinë' lahuë' Dios, ate' bulu'dödë' lu
 ná'agaquië' gadxi lúzuba' böa' bēdxi. ³ Ní'irö bidë'
 ia'túë' gubáz lá'ayi, nu'ë tu zxíga'do' néquini oro, en
 guzuínë' ra' bucugu yehua' yubá ni'. Gulú'udë'ë

yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. ⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. ⁵ Ní'irö gubáz lá'ayi na' bulië' zxi'ga'do' na' len bo' yalaj dxía lu bucugu na', ate' gurú'unë' le luyú. Gunnë guziú', ate' bö zidzaj biyön. Guyëpi yösa, en gudödi budó' zxu'.

Tu'cödxë' lúzuba' böa' bëdxi

⁶ Ní'irö igádxité' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

⁷ Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

⁸ Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'láti'do'os ca gatsaj tu gatsaj nísado' na' böáca rön. ⁹ Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

¹⁰ Bucödxë' gubáz lá'ayi bunny lúzuba' böa' bëdxi, ate' böxaj tu böläj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú. ¹¹ Böläj ni läba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böáca silá'.

12 Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' bölaj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zeni' bölaj, en beo' ia'láti'do'os ca gatsaj tu gatsaj rëla.

13 Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnnë: "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tsonnë' gubáz lá'ayi na' lúzuba' böa' bëdxi!"

9

1 Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu bölaj lúzxiba böxaj luyú, ate' bulu'nödzjë' nu na' xzí'ini guié que lataj chul-la. 2 Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'. 3 Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë lézacaba' lataj iládu'ba' bönachi ca tunba' xöjnö' dzö'öba' luyú. 4 Gunná bé'enë' lézacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en calëga yugu' yaga, pero gácasö iládu'ba' bönachi na' biti' da' lë na' naca bë' nu nequi queë' Dios ra' xigágaquië'. 5 Biti' bë'ë lézacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. 6 Yugu' dza na' ilë'enë' yugu' bönni' iluti

cuíngaquië', pero biti' ila'zéqui'në'. Ilë'ëninë' ilátië', pero ucuíta cuini yöl-la' guti.

⁷ Nalá'gacaba' böchi'zu na' ca nácagacaba' böa' nácugacaba' le néquiguequini guíë, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca bönachi. ⁸ Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bëdxi guixi'. ⁹ Nácugaca luchú'ugacaba' le néquini guíë. Ta'gú'u bö xiligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. ¹⁰ Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'. ¹¹ Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹² Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

¹³ Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ruí'i didza' gatsaj láhui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios. ¹⁴ Chi'i ni ruí'ilen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

¹⁵ Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacué' yödzölió. ¹⁶ Biyönda' tsca

nácagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopa gayuá' mil milë'.

¹⁷ Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bédxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre. ¹⁸ Yugu' lë na' ta'rúaj ruá'agacaba' bétigaca tu cö' tsa tu tsonna cö' bönachi nacuá' luyú, lë na' nácagaca guí', en dzön, en lë na' ruzégui'da'. ¹⁹ Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

²⁰ Ia'zícá'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guió'j budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹ Biti' bulu'bí'i ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ë tu guíchido'

¹ Ní'irö bilé'eda'-në' ia'tué' gubáz lá'ayi nál-la, bötjé' birúajé' yehua' yubá, nácuë' böaj lúzxiba, en zoa ca tu biguita' ícjalë'. Rëpi yösa bení' lahuë' ca run gubidza, ate' nácagaca ní'ë ca ya'zxön ta'yegui.

² Zoa lu në'ë tu guíchido' nayalaj, ate' tu ni'ë ibëla

nulibë' lu nísado', en ia'tú ni'ë yögöla nulibë' luyú bidxi. ³ Ní'irö bē'ë zidzaj didza', ate' biyön chi'ë ca riyön cate' ribödxi'aba' bēdxi guixi', en cate' budxi bē'ë zidzaj didza' na', bila'yöni chí'igaca gadxi guziú'. ⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruíi didza' yehua' yubá, rē neda': "Bucáchi'sö didza' ni gulu'íi gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-nē' zuínē' lu nísado', en luyú bidxi, guchisa nē'ë ibēla zaca' lúzxibalö, ⁶ ate' ben tsutsu xtídzē'ë ni'a que Nu na' zoa caz, Nu na' ben yehua' yubá, en le nacué' ni', enca' yödzölió, en le nacué' ni', enca' nísado', en le nacué' ni', ate' gunnē': "¡Bíti'rö tse! ⁷ Cate' ucödxē' gubáz lá'ayi igadxi lúzuba' böa' bēdxi, usudxinē' Dios le nagachi' queē', lē na' bulu'ínē' yugu' huen dxin queē', bönni' ni' gulu'ë didza' uláz queē'."

⁸ Ní'irö chi'i na' biyönda' rirúaj yehua' yubá bē'len neda' didza' leyúbölö. Gunná: "Guyéaj, yöjxi' guíchido' nayalaj na' zönē' gubáz lá'ayi na' nulibë' lu nísado', en luyú bidxi."

⁹ Guyija' ga na' zoē' gubáz lá'ayi na', en gunábida'-nē' gunnē' guíchido' na' quía'. Gubáz lá'ayi na' gudxē' neda', gunnē': "¡Guzxí, gudagu! Lu ru'u gaca zxixi ca naca bidxína'do' queéba' buz, pero lē'u huóaca silá'."

¹⁰ Guzxí'a guíchido' na' zönē', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lē'a. ¹¹ Ní'irö gudxē' neda': "Ral-la' gu'u didza' leyúbölö uláz queē' Dios lógaca zían cö' bönachi izá'a, en gapa nacué' yúgu'tē

yödzö, en gapa tu'i zián didza' yúbölö, en lógaca zián bönni' unná bé'."

11

Chopë' bönni' tunë' ba nalí

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacué' ni' ta'yéaj ládxi'gaca Dios. ² Bucá'ana ca' lö'a que yudo' na' dë ní'ilö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chopa-un beo'."

³ Gudxë' ca' neda': "Isöl-la'a chopë' bönni' ilunë' ba nalí quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácugaquië' lari' le naca bödzádzado'." ⁴ Chopë' bönni' ni tunë' ba nalí, nácugaquië' chopa yaga olivo na' nazúaj lu guichi lá'ayi ca naca quégaquië', en nácugaquië' ca' chopa le nuá'gaca guí' na' nacué' lahuë' Dios, Xani yödzölió. ⁵ Channö guë'ëni nu guá' dö' quégaquië', irúaj guí' ruá'agaquië' le usuniti nu na' ré'ëni guá' dö' quégaquië', en guti nu na', enca' nupa ta'dá'baga' légaquië'. ⁶ Chopë' ni dë lu ná'agaquië' ulu'záguë'ë xinöza nisa guiöj lúzxiba, para cabí galaj guiöj tsca dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huöáca nisa rön, en ilunë' ga gatsaj yödzöhuë' yödzölió. Ilunë' caní bálati'tës luzuí ilë'ënnë'. ⁷ Cate' údxi ilunë' ba nalí, irúajba' böa' sínia' lataj chulla, en tíl-lalenba' légaquië', en ucúl-laba' légaquië', en gútiba' légaquië'. ⁸ Le gulaca cazë' ila'túlusö ca' la' nöza lu yödzö zxön, ga ni' gudë'ë ca' Xanru' lë'e

yaga cruz, en ca rucúdzuru' didza', nazí'i le ca' Sodomá, enca' Egipto. ⁹ Idú ca tsonna dza yu' gatsaj bönachi yúgu'tè yödzo, en yúgu'tè bönachi izá'a, en bönachi tuí'i zían didza' yúbölö, en bönachi yúgu'tè luyú, ila'lé'eni le gulaca cazë', en bití' iluí' lataj nu ucache' légaquië' yeru ba. ¹⁰ Ulu'dzëjade'e nupa nacua' yödzo'lió tu' gulatië', ate' lu yöl-la' rudzeja quéguequi ila'söl-la' le ulu'nödzej quégaca luzë'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacua' yödzo'lió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'tè nupa bila'lé'e légaquië'. ¹² Ní'irö bë' zidzaj didza' tu chi'i yehua' yubá, en gudxi légaquië': "Gulí'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. ¹³ La' ní'sö gudödida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzo na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ní' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunny le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' gulu'í zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzo'lió nadödigaca lu në'ë Xanru' Dios, en lu në'ë Cristo.

Lë' inná bë'tica'së'.

¹⁶ Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios.

¹⁷ Ta'nnë':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu',

en risí lo' rinná bë'u!

¹⁸ ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usöröu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácacaca cá'asö, en nupa nácacaca lo!

¡Chibidxín dza usunítu' nupa bulu'suniti yödzölió!

¹⁹ Ní'irö gualaj yudo' queë' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné guziú' luyú. Gudödi budó' zxu', en gurö'ö guiöj bögui' yöla sunna.

12

Tunu nigula, en tuba' bëla zxön xitsiní'

¹ Ní'irö bilá' lahui yehua' yubá tu le naca bë'da', buluí'lonu tu nigula náccunu le naca ca gubidza, en zoa zcan ní'anu beo'. Dxía ícjanu tu le néquini oro ga dxíagacaba' chinnu böljaj bení'. ² Nigula ni chizóa soa bí'ido' queënu, en ribödxinu tu' rúdia' lé'ënu. Riguí' rizáca'nu ruzóanu bí'ido' queënu. ³ Ní'irö ia'tú le naca bë' bilá' lahui yehua' yubá. Buluí'i

loba' tuba' bëla zxön xitsiní'. Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. ⁴ Len xibanba' gú'uyöjba' tu cö' tsa tu tsonna cö' böläj lúzxiba, en gurú'unaba' légacaba' luyú. Guzuíba' bëla zxön xitsiní' na' lonu nigula na' chizóa sóabi' bí'ido' queënu. Zóaba' sina' gáguba'-bi' bí'ido' queënu na' ca gáljabi' na'. ⁵ Buzóanu-bi' tubi' bi'i bönni'do' ralla' inná bé'ebi' yúgu'të yödzö len tu xiyaga guië. La' bucuítatë'ë-bi' Dios bí'ido' queënu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë. ⁶ Buzxúnajnu nigula na', zéajnu lu lataj cá'asö, ga ni' chinupë'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca lëba' ⁸ pero biti' bila'deli' lu gudil-la na'. Que lë ni na' bíti'rö bidzöli xilátjagaca yehua' yubá. ⁹ Caní guca, gula'rú'unë'-ba' bëla zxön xitsiní' na' ní'ilö. Nácaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

¹⁰ Ní'irö biyönda' tu chi'i ru'í zidzaj didza' yehua' yubá, rna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'rú'unë' ní'ilö nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queëru'. ¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu'

bulu'gunë' dxin didza' na' gulunë' ba nalí queë'. Biti' gulu'í ládxi'gaquië' yöl-la' na'bán quegaquië', pero gulátië'. ¹² Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dë lataj que."

¹³ Cate' gúquibe'eba' bëla zxön xitsiní' na' chigula'ró'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu. ¹⁴ Ní'irö Dios bë'ë-nu nigula na' chopa xíliba' bisia' nácgaca zxön para gaca sunu, en ícuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj. ¹⁵ Bëla zxön xitsiní' na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'. ¹⁶ Ní'irö luyú gúcalen nigula na'. Guyalaj luyú na', en gü'i nisa yegu na' gúbaba' bëla zxön xitsiní' na'. ¹⁷ Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queënu dí'a dza queënu, nupa na' tun ca rnna le gunná bë'ë Dios, en nazí' lu në'eguequi le nunë' Jesucristo ba nalí.

13

Chópaba' böa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naça xihui' le cabí rilé'e Dios dxi'a. ² Böa' sínia' na' bilé'eda'-ba' riná'aba' ca nácaba' tu bédxito',

nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bēdxi guixi'. Bēla zxön xitsiní' na' budödiba' lu na'aba' böa' sínia' ni yöl-la' huáca queēba', enca' xilátjaba' ga rinná bē'ēba', en yöl-la' unná bē' zxön queēba'. ³ Dxía huē' tu ícjaba' böa' sínia' na', le naca le guti lēba', pero buniti huē' na', ate' bulu'bani yúgu'tē bönachi yödzölió, en yöjdá'gaca böa' sínia' na'. ⁴ Gula'yéaj ládxi'gaquiē'-ba' bēla zxön xitsiní' na', tu' budödiba' yöl-la' unná bē' queēba' lu ná'aba' böa' sínia' na'. Gula'yéaj ládxi'gaquiē'-ba' böa' sínia' na', en gula'nné': “¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lēba'?”

⁵ Guta' lu ná'aba' böa' sínia' na' bē'ēba' didza' ba zxön, en didza' xihui' le rinnēba' queē' Dios. Idú ca chopa-un beo' guta' lu ná'aba' yöl-la' unná bē'. ⁶ Gusí loba' rinnēba' queē' Dios, en rinné xihui'ba' que Lē' Dios, en que lataj lá'ayi queē', en quégaca nupa nacué' yehua' yubá. ⁷ Guta' lu ná'aba' gudíl-lalenba' nupa néquiquequi quez queē' Dios, en bucúl-laba' légaquiē'. Guta' ca' lu ná'aba' gunná bé'eba' yúgu'tē bönachi izá'a, bönachi yúgu'tē yödzö, en bönachi tuí'i yúgu'tē didza' yúbölö, en bönachi idútē yödzölió. ⁸ Yúgu'tē bönachi nacué' yödzölió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na'bán, guichi na' buzúajē' Bönni' na' náquiē' Bö'cu' Zxíla'do' queē' Dios cate' si' guta' yödzölió. Buzóa cazē' Dios gútiē' Bönni' na' ni'a quégaca bönachi queē'.

⁹ Channö nu riyöni, ral-la' uzē' nagui. ¹⁰ Nupa nucu'ē' Dios idzúngaca, ral-la' idzúngaca, ate' nupa

nucu'ë Dios para nu guti léguequi len guié tuchi', len guié tuchi' ilátigaca. Que lë ni na', ral-la' ila'böza zxön ladxí' nupa néquiguequi queë' Dios, en ta'yéajlë' Lë'.

11 Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxiagaca chopa lúzuba' ca naca lúzuba' bö'cu' zxila', en ruí'iba' didza' ca na' ruí'iba' didza' bëla zxön xitsini' na'. 12 Dë lu ná'aba' böa' sínia' ni yúgu'të yöl-la' unná bë' queëba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ladxí'gaca yúgu'të bönachi nacuá' yödzölió böa' sínia' zí'alö na', böa' na' buniti huë' le guti lëba'. 13 Böa' buropi na' runba' ca' le nácagaca bë' ga ridxintë runba' ga ruhuóxaj guí' le za' lúzxiba, en ruhuóxaj luyú lógaca yúgu'të bönachi. 14 Rizí' yé'eba' bönachi nacuá' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bë'eba' bönachi nacuá' yödzölió ilunë' tu budó' ca nácaba' böa' sínia' na' gúcaba' huë' que guié tuchi', ate' nabanba'. 15 Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en gü'i didza' budó' ni, en gun ga nu guti yúgu'të nupa bití' ila'yéaj ladxí'gaca le. 16 Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. 17 Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. 18 Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca

le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

¹ Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuínë' lu gu'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'. ² Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxön, en ca rinnë guziú'. Biyönda' le riyön cate' ta'guínnië' lë'e tu le rul-la zë zían du que. ³ Tul-lë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzölió. ⁴ Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Söjácalenë' Bönni' na' náquië' Bö'cu' Zxíla'do' gátitës ga sa'yéajë'. Cristo caz böá'uë' légaquië' ladjagaca bönachi, ate' nácagaca nupa bulu'dödi cúngaquië' zí'alö queë' Dios, enca' queë' Bönni' na' náquië' Bö'cu' Zxíla'do'. ⁵ Catu caz gula'zí' yë'ë, ate' cuntu nu gaca bi innë quégaquië' ga na' nacu'ë ca dödilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

⁶ Ní'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacuá' yödzölió,

bönachi idütë luyú, yúgu'të bönachi izá'a, en bönachi tu'i yúgu'të didza' izá'a, en bönachi yúgu'të yödzo.
 7 Ru'ë zidzaj didza', rnnë: "¡Gulí'gádxí Dios, en guli'cu'ë yöl-la' ba tu' chizóa uchi'a usöröë' bönachil ¡Guli'tséaj ládxi'ë Dios, nunë' lúzxiba, en luyú, en nísado', en gapa ralaj nisa!"

8 Ia'tué' gubáz lá'ayi söjnáhuë' gubáz lá'ayi ni, en rnnë: "¡Chibudxi que yödzo Babilonia! ¡Chibudxi que yödzo zxon na'! Caní guca que, tu' gulún nupa nacua' ni' ga gula'z'í lu ná'agaquië' bönni' yúgu'të yödzo ilunë' ca ná'cagaca le ta'zë ládxi'gaquië' le ruá' dö'."

9 Ia'tué' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë: "¡Channö nu tseaj ladxi'-ba' böa' sínia' na', enca' budó' queéba', en güi'i lataj ta' ra' xigué o lu në'e le naca bë' da' lëba', 10 gunë' Dios nu ni xigua' lu yöl-la' rilé queë'! ¡Qui'i saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! 11 Cuéntica'sö dzön que guí' ga ni' quí'i saca' nu na'. Rëla, en te dza qui'i saca', ate' catu caz gata' lataj ulu'z'í ládxi'gaca nupa ila'yéaj ládxi'gaca-ba' böa' sínia' na', en budó' queéba'. Bití' ulu'z'í ládxi'gaca nupa iluí'i lataj ta' laba' léguequi. 12 Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxon ladxi'."

13 Ní'irö biyönda' chi'i nu ruí'i didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë: "¡Ca' gaca! ¡Ulu'z'í ládxi'gaquië' lu dxin gulunë', en ulu'zi'ë xibé ca

sa'yéaj le gulunë'!"

Tu'zi'ë le rulá' luyú

¹⁴ Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljé' Bönachi, ate' dxía icjé' tu le néquini oro, ate' zönë' tu guié tuchi' lu në'ë.

¹⁵ Birúajé' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxé' Nu na' rö'ö lu böaj na', gunné': "¡Bugún dxin guié tuchi' quiu', en guchugu zxoa' xtila, tu' chibidxín dza nu uzí' le! ¡Chinabídx do que le dé yödzölió!"

¹⁶ Ní'irö Nu na' rö'ö lu böaj na' bugún dxin guié tuchi' idütë yödzölió, ate' buzi'ë le rulá' luyú.

¹⁷ Ní'irö birúajé' tu gubáz lá'ayi lu yudo' zoa yehua' yubá. Nu'ë ca' tu guié tuchi'. ¹⁸ Birúajé' ia'tué' gubáz lá'ayi ra' bucugu ni', dë lu në'ë inná bé'enë' guí, ate' bë'ë zidzaj didza', en bulidzë' gubáz lá'ayi zí'alö na' nu'ë guié tuchi', gunné': "¡Bugún dxin guié tuchi' quiu', en butubi tu'xóa huéaj le ta'bía lubá uva rö'gaca yödzölió, tu' chiná le ta'bía lubá uva!"

¹⁹ Ní'irö gubáz lá'ayi ni bugunë' dxin guié tuchi' idütë yödzölió, en butubë' le ta'bía lubá uva rö'gaca luyú, ate' yöjchú'unë' le ta'bía lubá uva na' lu yeru zxön ga ízí xisi. Yugu' lë ni rulu'í ca gunë' Dios, gunë' xíguia' bönachi nacúa' yödzölió. ²⁰ Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsca gaca sá'aru' idú chinnu dza.

15

Yugu' gubáz lá'ayi nuá'gaquië' gadxi yödzöhuë'

¹ Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxi gunë' xíguia' bönachi yödzölió.

² Bilé'eda' ca' tu le naca ca tu nísado' le rëpi yösa bení' ca guiøj jara le nutsí'i guí'. Nupa na' bulu'xicja lu böa' sínia' na', en lu budó' queéba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios queégaquië'.

³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':

¡Li', Xantu' Dios, zxöntëro nacu' Li'!

¡Zxöntëro naca yúgu'të le benu',

le tun ga rubánitu'!

¡Li' rinná bé'enu' yugu' yödzö!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'të yödzö,

en ila'yéaj ládxi'guequi Li'

tu' ta'lé'e naca tsahui' yúgu'të le runu'!

⁵ Gudödi guca lë ni, buyúa', en bilé'eda' gualaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'. ⁶ Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. ⁷ Ní'irö tu nu nutsa' ladaj idapa

nupa na' nabángaca, bē' que queëgaquiē' gadxi gubáz lá'ayi na' gadxi zxíga'do' néquiguequini oro, en yúdzugaca le ruluí'i yöl-la' rilé queë' Dios, Bönni' zoa cazē'. ⁸ Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuē' na' nuá'agaquiē' gadxi gubáz lá'ayi na'.

16

Yugu' zxíga'do' yúdzugaca le ruluí'i yöl-la' rilé queë' Dios

¹ Ní'irö biyönda' chi'i nu ruí'i zidzaj didza' lataj lá'ayi na', en rē gadxi gubáz lá'ayi na', rnna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lē na' ruluí'i yöl-la' rilé queë' Dios!"

² Guyijē' gubáz lá'ayi zí'alö, en yöjla'ljē' le yudzu zxíga'do' na' zönē' lu yödzölió. Lē na' yudzu zxíga'do' na' ben ga gutsaj yudzu' ya'a le riláda' idútē le naca caz nupa na' da' léguequi le naca bē' dá'gaca böa' sínia' na', enca' nupa na' ta'yéaj ládxi'gaca budó' queëba'.

³ Ní'irö guyijē' gubáz lá'ayi buropi, en yöjla'ljē' le yudzu zxíga'do' na' zönē' lu nísado', ate' nisa na' böáca rön ca naca rön queë' tu bönni' nati, ate' gulati yúgu'tē nupa nabángaca nacuá' lu nísado' na'.

⁴ Guyijē' gubáz lá'ayi bunny, en yöjla'ljē' le yudzu zxíga'do' na' zönē' gapa dē yegu, en gapa ralaj nisa, ate' gapa dē nisa na' bulu'huóaca rön. ⁵ Ní'irö biyönda' ru'ē didza' gubáz lá'ayi na' dē lu nē'ē rinná bé'enē' nisa na', rnnē': "¡Xantu' Dios Lá'ayi!

¡Zoa cazu', en guzóa cazu'! ¡Tshui' nacu' tu' richugu' caní quégaca bönachi ⁶ tu' bulu'laljé' rön quégaca nupa néquiquequi quez quiu', en quégaca nupa guluí'i didza' uláz quiu'! ¡Na'a, Li' runu' ga ilé'ajé' rön, tu' caní ral-la' gaca quégaquié'!"

⁷ Ní'irö biyönda' ruí'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bé'! ¡Idúté li, en tshui' naca ca richugu' quégaca bönachi!"

⁸ Guyijé' gubáz lá'ayi budapi na', en yöjlaljé' le yudzu zxíga'do' na' zöné' lu gubidza, ate' gubidza na', bé'ë Dios le lataj uzéguí'da' bönachi len guí' que. ⁹ Gula'yéguí'da' yúgu'té bönachi tu ruzéguí'da' gubidza, pero bití' bulu'bí'i ládxi'gaca, en bití' gula'gú'u Dios yöl-la' ba. Gula'nné zí'i queé' Dios, Bönní' dë lu në'ë inná bé'ené' yugu' lë ni tu'saca' zí' bönachi.

¹⁰ Guyijé' gubáz lá'ayi guyu' na', en yöjlaljé' le yudzu zxíga'do' zöné' lu xilataj böa' sínia' ga na' rinná bé'ëba', ate' gurö'ö chul-la gapa rinná bé'ëba'. Ní'irö, tu' gula'guí'i gula'zaca' bönachi, guláguya'a lúdxí'guequi, ¹¹ pero bití' bulu'bí'i ládxi'gaca para cabirö ilúngaca le ruá' dö' tuné'. Gula'nné zí'i queé' Dios zoé' yehua' yubá tu' ta'guí'i ta'zaca', en tu' dxíagaca yudzu' ya'a na'.

¹² Guyijé' gubáz lá'ayi buzzopi na', en yöjlaljé' le yudzu zxíga'do' na' zöné' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dödi nupa ta'nná bé', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsiní' na', en böa' sínia' na', en bönní' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu

ruá'agaca nupa na'. Nalá'gaca ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bē' le ilún ga ulu'bani bönachi. Yöjaca bö' xihui' na' idú yödzölió, en yöjtúbígaca nupa ta'nná bē', para tsöjáquiē' lu gudil-la na' gaca lu dza zxön queē' Dios, Bönni' napa cazē' yöl-la' unná bē'. ¹⁵ Caní rnnē' Dios: "¡Buli'yútsöca'! Guída' tsárido'os ca ridxinē' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí' nu na' lahui' lógaca bönachi." ¹⁶ Yugu' bö' xihui' na' bulu'tubi yugu' bönni' ta'nná bē'ē, ate' bulu'dubē' tu lataj nazí'i le lu didza' hebreo: Armagedón.

¹⁷ Guyijē' gubáz lá'ayi igadxí na', en yöjlaljē' le yudzu zxíga'do' na' zönē' lu bö'ös, ate' bē' zidzaj didza' tu nu zoa lu lataj lá'ayi zoa yehua' yubá ga dē lataj lo na', rna: "Chinaca."

¹⁸ Ní'irö guyēpi yösa, en gurö'öda' bö, en gunnē guziú'. Gudödida' budó' zxu', le gudödida'rö ca gudödi tsanni ni nacué' bönachi yödzölió. ¹⁹ Birúaj tsonna cö'ölö yödzö zxön na', ate' gula'guínnaj yödzö nacué' yödzölió. Yöjnenē' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queē' benē' xíguia' nupa nacué' ni'. ²⁰ Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guí'ado'. ²¹ Böxaj ca' guiój bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guiój bögui' na' ca tu gayuá' guié, ate' yúgu'tē bönachi gula'nnē xihui' queē' Dios tu' nözi guiój bögui' na' tu' bulu'sáca'da' zi'iléguequi.

17

Dios richúguië' queënu nigula udá dzaga

¹ Ní'irö bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bé'lenë' neda' didza', gunnë': "Gudá ni, ate' uluí'ida' li' ca gunë' Dios, gunë'-nu xíguia' nigula udá dzaga na', rő'önu lu nísado' zían.

² Gula'cua'len lënu nupa ta'nná bë' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lënu le biti' naca dxi'a."

³ Dios Bö' Lá'ayi guzóalenë' neda', ate' gubáz lá'ayi na' guchë'ë neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os. Dxíagaca gadxi ícjaba', en chi lúzuba', en dá'gaca ca' lëba' le ta'nnë xihui' queë' Dios. ⁴ Nigula na' dxíanu lëba' nácunu lari' xiná chul-la, en lari' xiná guí'ido'os. Nazí'i biquitaj queënu le néquiguequini oro, en yugu' guiöj nazaca', en yugu' bugá. Lu ná'anu rő'ö tu zxíga'do' néquini oro, en yudzu le nácagaca xihui', en le ruá' dö' runnu. ⁵ Ra' xigánu dá'gaca ca lënu, le tu'luí'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió."

⁶ Gúquibe'eda' nazúdxinu nigula na' tu' bennu ga gulaj rön quégaca nupa néquiguequi queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'.

⁷ Gudxë' gubáz lá'ayi na' neda', gunnë': "¿Bizx que rubáninu'? Uzéajni'ida' li' lë na' nagachi', le ruluí'i ca naca nigula ni, enca' le ruluí'i ca naca böa' sínia' na' dxíanu-ba', böa' na' dxíagaca gadxi ícjaba', en chi

lúzuba'. ⁸ Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na'bán, le buzúajë' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atëlö, pero biti' zóaba' na'a, ulu'bani tu' nubanba'.

⁹ Lë ni naca tu le uzéajni'i nu gaca tséajni'i: Gadxi ícjaba' na' tu'luí'i gadxi guí'ado' gapa rő'önu nigula na'. ¹⁰ Lësca' caní gadxi ícjaba' na' tu'luí'i gadxë' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'tué' biti' ridxíninë', pero cate' guídë', inná bë'ë tu chí'ido'osö. ¹¹ Böa' sínia' na' guzóaba', pero biti' zóaba' na'a, ruluí'i tu bönni' izzunu', inná bë'ë. Nunë' tsözxön bönni' gadxi na', ate' tödi ni nítië' tsaz.

¹² 'Chi lúzuba' na' bilé'enu' tu'luí'i chië' bönni' ila'nná bë'ë. Biti' ta'zí'ininë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxön len böa' sínia' na'. ¹³ Chië' bönni' ni, lëbisö nácagaquië', ate' ulu'dödë' yöl-la' unná bë' quégaquië', en le nazí' lu ná'agaquië' lu ná'aba' böa' sínia' na'. ¹⁴ Ila'díl-lalenë' Bönni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bë'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'."

¹⁵ Gubáz lá'ayi na' gudxë' ca' neda', gunné': "Yugu' nísado' na' bilé'enu' gapa ni' rő'önu nigula udá dzaga na', tu'luí'i bönachi yugu' yödzö, en

yugu' bönachi izá'a, en bönachi tuí'i yugu' didza' yúbölö, en bönachi yugu' luyú. ¹⁶ Chi lúzuba' böa' sínia' na' bilé'enu', en tu'luí'i chië' bönni', bití' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídisö. Ilahüë' xipéla'nu, en ulu'zégui'ë'-nu len guí'. ¹⁷ Dios uchízië' icja ládxi'do'gaquië' chië' bönni' na' le gun ga ilunë' ca rë'ëni quézinë' Lë', ate' ilácagaquië' tuz, en ulu'dödë' yöl-la' unná bë' quégaquië' lu ná'aba' böa' sínia' na' para gaca ca rnna xtídzë'ë. ¹⁸ Nigula na' bilé'enu'-nu ruluí'i yödzö zxön na' rinná be'e nupa ta'nná bë' yödzölió ni."

18

Riguinnaj yödzö Babilonia

¹ Gudödi na' bilé'eda'-në' ia'tuë' gubáz lá'ayi ruhuötjë' rirujä' yehua' yubá, en dë lu në'ë yöl-la' unná bë' zxön, ate' guyëpi yösa bení' luyú ni'a que yöl-la' bení' queë' gubáz lá'ayi na'. ² Bë'ë zidzaj didza' gubáz lá'ayi na', gunné':

¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsini', en yugu' biguínni xihui' tu'zóaba' xilátajgacaba' ni'!

³ Caní guca que yödzö na' ni'a que le gulún bönachi nacua' ni'.

Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquië' le ruá' dö',

ate' guta' yöl-la' tsahui' quégaquië' bönni' to'o tuti'
 nacu'ë yödzülió
 tu' guyánda' yugu' le nazaca' gula'zë ladxi' bönachi
 ni'.

⁴ Ní'irö biyönda' ruí'i didza' ia'tú nu zoa yehua'
 yubá, rnna:

Guli'ruáj lu yödzo na', libí'ili' néquili' quia'
 para cabí gunli' dul-la' tsözxön len légaquië',
 en para cabí quí'i sáca'li' le gaca quégaquië'.

⁵ Nayánda' dul-la' nabága'gaquië',
 en chinayasa nadxín caz lúzxiba,
 pero Dios röjnenë' le ruá' dö' núngaquië'.

⁶ Buli'bí'i quégaquië' ca na' gulunë' queéli'.
 Buli'bí'i quégaquië' chopa cö' tsca le gulunë'.
 Buli'bí'i quégaquië' chopa cö' tsca le naca xihui'
 gulunë' queéli'.

⁷ Guli'gún ga ila'guí'ila'záquië', en ila'bödxi yéchë'ë
 tsca guca yöl-la' ba, en yöl-la' zxön gulufi'
 cúngaquië'.

Ta'zá ládxi'gaquië', ta'nnë':

Rö'ötu' ni, rinná bë'ëtu'.

Biti' nácatu' uzëbi, en catu caz cödxí yéchi'tu'.

⁸ Que lë ni na', tu dzasö ila'dxín quégaquië' le
 ila'guí'ila'záquië',
 yöl-la' guti, en yöl-la' ribödxi yechi', en yöl-la' ridún.
 Iléguië' lu guí', tu' napa cazë' yöl-la' huáca zxön
 Xanru' Dios.

Lë cazë' usiúdxë' quégaquië'.

⁹ Ní'irö gunné': "Ila'bödxi nupa ta'nná bë' luyú
 yödzülió, en gulún le ruá' dö' tsözxön len légaquië',
 en bulu'zí' xibé le nequi quégaquië'. Ila'bödxë', en
 ila'bödxi yéchë'ë cate' ila'lé'enë' dzön que yödzo
 zxön na' régui. ¹⁰ Zi'tu' zí'tu'sö ila'cu'ë tu' iládxinë'

ca gaca xíguia' le gaca que yödzö na', ate' ila'nné':
 ¡Bica' bayechi' Babilonia, yödzö zxön ni, le gúcada'
 lo! ¡Tu dzasö guca xíguia' que!"

¹¹ Ní'irö gunné': "Ila'bödxé' ca' bönni' to'o tuti'
 nacu'ë yödzölió, en ila'bödxí yéché'ë ni'a que yödzö
 na' tu' cabirö soa nu ga'u bi ilúti'ë ni'." ¹² Cúnturö
 nu ga'u ni':

Le néquiguequini oro, en plata,
 en yugu' guióǵ zaca', en yugu' bugá,
 en yugu' lari' nazáca'da', en lari' xiná chul-la,
 en lari' dxí'ado', en lari' xiná guí'ido'os,
 en yugu' yaga rilá' zxixi,
 en le néquiguequini dxita nazáca'da',
 en le néquiguequini yaga nazáca'da',
 en le néquiguequini guié cobre,
 en le néquiguequini guié,
 en le néquiguequini guióǵ jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
 en le rilá' zxixi que mirra, en que yöǵ olíbano,
 en xisi uva nál-la, en le naca za,
 en yiözja dxí'ado', en xxa' xtila,
 en yugu' búrrodo', en yugu' bö'cu' zxila',
 en yugu' böa', en yugu' carreta,
 en yugu' bönni' huen dxin, en ia'bal-la bönachi.

¹⁴ Nupa na' to'o tuti' ilé légaquié', ila'nná:

Nadúagaca le guzé ládxi'li'.
 Chigudödi quégaca yöl-la' tsahui',
 en le nácagaca lachi queéli',
 ate' bíti'rö idzölili' léguequi.

¹⁵ Ní'irö gunné': "Ila'bödxé' bönni' to'o tuti' na',
 tu' guta' quégaquié' yöl-la' tsahui' tu' gulúti'ë lu

yödzö na', ate' ila'cu'ë zi'tu' zí'tu'sö tu' iládxinë
ca gaca xíguia' le gaca que yödzö na', en ila'bödxí
yéché'ë." ¹⁶ Ila'nné':

¡Bica' bayechi' yödzö ni guca zxön!
Guca ca tu nigula nácunu lari' nazáca'da',
en lari' xiná chul-la, en lari' xiná gu'ido'os,
en nazí'i biquitaj queënu le néquiguequini oro
en le néquiguequini guió'j zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en
nupa nacuá' lé'egaca barco na', en nupa tu'sá'
yugu' barco na', en nupa tun dxin lu nísado',
ila'cu'ë zi'tu' zí'tu'sö." ¹⁸ Cate' ila'lé'ené' dzön que
yödzö na' régui, ila'bödxë', en ila'nné': "¿Bízxilö
yödzö guca zxön ca naca yödzö ni?"

¹⁹ Ní'irö gunné':

Ulu'dxië' bëchtö ícjagaquië'.

Ila'bödxë', en ila'bödxí yechë'ë, ila'nné'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la'
tsahui'

quégaca yúgu'të nupa nácagaca xan barco lu nísado'.

Tu dzasö guniti yödzö ni.

²⁰ Buli'dzeja ca gaca que yödzö ni, libí'ili' zóali'
yehua' yubá,

enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ruí'ili' didza' uláz queë'.

Buli'dzeja, tu' chiguchúguië' Dios que yödzö ni

ni'a que bi gulún queëli' nupa nacuá' lu yödzö ni.

²¹ Ní'irö tuë' gubáz lá'ayi nál-la buchisë' tu guió'j
zxön le naca ca tu guichi riyëtu, ate' gurú'uné' le lu
nísado', gunné':

La' canísö gaca que yödzö Babilonia,
tu' iguínnej yödzö na' guca lo,
ate' bíti'rö nu udzöli le.

²² Bíti'rö nu yöni lu yödzö na' nupa ta'guínni lè'e le
rul-la,

en calëga nupa tu'cödxí gui
en calëga nupa tu'cödxí lúzuba' böa' bëdxi.

Bíti'rö udzöli bönni' huen dxin ni',
en bíti'rö yöni bö rigú'u le rutu ni'.

²³ Bíti'rö uzení' nitú guí' lu yödzö na',
en bití' yöni chí'ë bönni' rutsaga në'ë ni',
en calëga chí'ibi' bí'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li'
lu yödzö ni,

en guzxí' yé'eli' bönachi idútë yödzölió len yöl-la'
gudzá' queéli'.

²⁴ Lu yödzö ni gulaj xichöngaqueí' bönni' gulu'ë
didza' uláz queë' Dios,

en xichöngaca nupa néquiquequi queë' Dios,
enca' xichöngaca yúgu'të bönachi yödzölió,
tu' bëtigaca nupa nacué' yödzö ni léguequi.

19

¹ Gudödi lë ni biyönda' tu'i zidzaj didza' bönachi
zián nacué' yehua' yubá, ta'nná:

¡Yöl-la' ba Dios! ¡Yöl-la' rusölá runë',
ate' yöl-la' zxon, en yöl-la' unná bë' napë' Dios
queëru'!

² ¡Naca idútë li, en tsahui' ca rusiúdxë'!

¡Guchúguië' que yödzö na' naca ca tu nigula udá
dzaga,

en quégaca bönachi lu yödzö na' ila'niti tsaz!

¡Gulún ditaj bönachi yödzölió tu' nözi le ruá' dö gulunë'!

¡Dios buzí' lëbë' légaquië'
tu' gulútië' yugu' huen dxin queë'!

³ Leyúbölö gula'nnë': "¡Yöl-la' ba Dios!
¡Cuéntica'sö dzön ga régui yödzö na'!"

⁴ Idapa uru'ë bönni' gula ni' bulu'tsaga lógaquië'
lu yu tsözxön len idapa nupa ni' nabángaca, en
ta'yéaj ládxi'gaquië' Dios, Bönni' rö'ë lataj lo queë'.
Gula'nnë': "¡Ca' gaca! ¡Yöl-la' ba Dios!"

⁵ Ní'irö biyönda' ruí'i didza' tu nu zoa lataj lo na',
rnna:

¡Guli'cu'ë Dios queëru' yöl-la' ba
yúgu'tëli' runli' xichinë', libí'ili' na' rádxi'li' Lë',
nácali' bönachi cá'asö, en bönachi lo!

*Laní que yöl-la' rutsaga na' queë' Bönni' náquië'
Bö'cu' Zxíla'do'*

⁶ Biyönda' ca' nu ruí'i zidzaj didza', le biyön ca
riyön cate' tuí'i didza' bönachi zián, en biyön ca' ca
riyön ga ridödi tu yegu zxön, o ca riyön cate' rinnë
guziú', ate' rnna:

¡Yöl-la' ba Dios tu' risí lahuë' rinná bë'ë!

¡Napa cazë' yöl-la' huáca!

⁷ ¡Ral-la' udzeja ládxi'ru', en uzí'iru' xibë',
en cú'uru'-në' yöl-la' ba

tu' chibidxín dza laní que yöl-la' rutsaga na'
queë' Bönni' na' náquië' Bö'cu' Zxíla'do'!

¡Si' lu në'ë Cristo nupa néquiguequi queë'!

¡Chinabá'a queëbi' bi'i utsaga ná'alenbi' Lë'!

¡Nácabi' le ruluí'i nupa na' néquiguequi queë'!

⁸ ¡Dios ru'ë-bi' lataj gácubi' lari' nazáca'da'
le naca idú, en rëpi yösa bení'!

Lari' nazáca'da' na' ruluí'i le naca tsahui' núngaca nupa néquiguequi queë' Dios.

⁹ Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do!"

Gudxë' ca' neda': "¡Yugu' didza' idútë li ni ru'ë didza' Dios caz!"

¹⁰ Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tuí'i didza' uláz queë' Dios, tuí'i didza' le naca idútë li ca naca queë' Jesús.

Bönni' dxíë'-ba' böa' chiguichi

¹¹ Ní'irö bilé'eda' nayalaj lúzxiba, ate' buluí'i loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí'i Didza' Le Nácate. Caní lë' tu' ruchi'a rusöröë' ca naca le naca idútë li, enca' caní tsejë' gudil-la. ¹² Rëpi yösa bení' guió'j lahuë', le nácagaca ca guí', en dxíagaca icjë' zían le néquiguequini oro. Nazúaj lahuë' tu le lë', le cuntu nu nözi, pero tuzë' Lë' nõzinë'. ¹³ Nácuë' tu lari' në'aj rön, en lë' ca' "Nu Naca Xtídzë'ë Dios." ¹⁴ Röjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácugaquië' lari' nazáca'da', le naca chiguíchido'os, en bití' naca bösaj. ¹⁵ Rirúaj ru'ë le naca ca tu guíë' tuchi' le gúninë' zí' bönachi yugu' yödzo. Inná bé'enë' légaquië' len tu xiyaga guíë', en gunë' légaquië' xíguia', le gaca quégaquië' ca raca que le ribía lubá

uva, zoa nu rulibi léguequi, tu' riléde'ené' Dios, Bönni' napa cazé' yöl-la' unná bë'. ¹⁶ Nazúaj lu lari' nácué', enca' lu xigatsjë' ca lë', "Bönni' Rinná Bé'ené' Nupa Ta'nná Bë'", enca' "Bönni' Náquié' Xángaca Nupa Nácagaca Xan."

¹⁷ Ní'irö bilé'eda'-në' tué' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Guli'dá, buli'dubi ga ni gáguli' laní zxön queë' Dios! ¹⁸ Gáguli' xipéla'gaca nupa ta'nná bë', en xipéla'gaca nupa ta'nná be'e bönni' röjáquié' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'të bönachi, nupa biti' nadó'ogaca, en nupa nadó'ogaca, nupa nácagaca cá'asö, en nupa nácagaca lo."

¹⁹ Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquié' gudil-la guizxi yu quégaquié', nudúbigaquié' para ilúnlené' gudil-la Bönni' dxíé'-ba' böa' chiguichi, dzágagaca Lë' ni'a në'ë guizxi yu. ²⁰ Bidzunba' böa' sínia' na', enca' bönni' na' bë'ë didza' uláz queëba', bönni' na' bené' yugu' le nácada' bë' loba', en guxzí' yé'ené' nupa ni' gulu'í' lataj nu uzúaj láhuiguequi lë na' naca bë' dá'gaca lëba', en gula'yéaj ládxi'gaca budó' queëba'. Böa' sínia' na', enca' bönni' na' bë'ë didza' uláz queëba', gula'ru'uné' léguequi nabángacasö ca' ga rö'ö guí' zxön le réguilen lë na' ruzéguí'da'. ²¹ Bönni' na' dxíé'-ba' böa' chiguích bëtié' yúgu'të nupa na' gudá'gaca léguequi len guié' tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudödi læ ni bilé'eda' ruhuöjtjè' tu gubáz lá'ayi, zè'è yehua' yubá, en zönè' zxi'ini guié que lataj chul-la, ate' nu'è tu du guié yödx. ² Guzxönè'-ba' bëla zxon xitsini' na', nácaba' bëla guzóaba' dza ni'te, bëla na' læba' Tu' Xihui', enca' Satanás, ate' bëguè'è-ba', en bucá'anè'-ba' caní chi gayuá' iz. ³ Yöjchú'unè'-ba' lataj chul-la, en busayjè' lataj na', ate' budé'è tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

⁴ Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixè' yénguequi yugu' bönni' biti' nácagaquiè' tsahui' tu' gulún ba nali queè' Jesús, en tu' gulún libán que xtídzè'è Dios. Yugu' bönachi ni biti' gula'yéaj ládxi'gaca böa' sínia' na', en budó' queéba', en biti' gulu'i lataj nu uzúaj ra' xigáquequi, o lu në'eguequi læ na' naca bë' nu da' læba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, ⁵ pero ia'zica'rö bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéquequi, pero ilácagaca bixúz queè' Dios, enca' queè' Cristo, ate' ila'nná bë'len Lè' chi gayuá' iz na'!

⁷ Cate' izá'a chi gayuá' iz na', ulu'sané' Satanás ga na' nadzún. ⁸ Urúaj Satanás, en tsöjzxi' ye'e

bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. ⁹ Guizxi yusö gula'dödë' idútë luyú, ate' gula'cu'ë lé'ajlö lataj ga na' nacuá' bönachi néquiguequi queë' Cristo, le naca yödzö na' nadxí'inë' Dios. Ní'irö benë' Dios ga böxaj guí' le birúaj yehua' yubá, le buzegui' légaquië'. ¹⁰ Tu' xihui' na' nazí' ye'e légaquië', yöjchú'unagaquië' le ga rö'ö guí' zxön que lë na' ruzégui'da', ga na' chizóaba' böa' sínia' na', enca' bönni' na' bë'ë didza' uláz queëba'. Ila'guí'i ila'zaca' ni' rëla, en te dza yúgu'të iz zá'gaca.

Ta'dxín bönachi lahuë' Dios ga rö'ë ruchi'a rusöröë'

¹¹ Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca. ¹⁴ Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. ¹⁵ Nupa bití' nazúajgaca lu guichi quégaca

nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Biti'rö dë nísado'. ² Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë Dios, en chinabá'a que ca nabá'a queébi' bi'i nigula chizóa utsaga ná'aleni' tu bönni'. ³ Biyönda' ruí'i didza' nu rna yehua' yubá: “¡Buli'yútsöca! ¡Ga zoë Dios zóalen bönachi! ¡sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi! ⁴Dios uzxië' nisa ribödxí zoa guiöj lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö.”

⁵ Ní'irö Nu na' rö'ö lataj lo ni' gunná: “¡Buyútsöca! ¡Yúgu'të ruúna' cubi!”

Gudxi ca' neda': “¡Buzúaj lu guichi lë ni, tu' naca idütë li didza' ni, en naca löza!”

⁶ Ní'irö gudxi neda': “¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga gu'aj nisa na' runna yöl-la' na'bán! ⁷ Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxi'ini caza', ⁸ pero nupa tadxi, en nupa bití' ta'yéajlë' neda', en nupa náagaca xihui', en

nupa tuti bönachi, en nupa tun le biti' naca tsahui', en nupa nácagaca udzá', en nupa ta'yéaj ládxi'gaca budó' guió'j budó' yaga, en yúgu'tè nupa ta'zí' yè', chizóa ribōza xilátjaguequi lu guí', ga ni' rō'ō guí' zxön que lè na' ruzégui'da', lè na' naca yöl-la' guti le raca burópilö."

Yödzö Jerusalén le naca cubi

⁹ Ní'irö tuè' gubáz lá'ayi nababè' gadxè' gubáz lá'ayi ni' gula'zönè' gadxi zxíga'do' yúdxugaca gadxi yödzöhuè' yöjsétegaca, bidè' ga zoa'. Gudxè' neda': "¡Gudá ni! ¡Uluí'ida' li' bi'i nigula na' si' utsaga ná'alénbi' Bönni' na' náquiè' Bö'cu' Zxíla'do'!"

¹⁰ Guzóalenè' Dios Bö' Lá'ayi neda', ate' guchè'è gubáz lá'ayi na' neda' tu lu guí'a sibi, en bu-luí'inè' neda' yödzö lá'ayi Jerusalén, ruhuötaj, rirúaj yehua' yubá ga zoè' Dios. ¹¹ Yödzö ni rëpi yösa bení' tu' zóalen le yöl-la' bení' queè' Dios. Rëpi yösa bení' ca rëpi yösa bení' tu guió'j nazáca'da' ca naca guió'j guí'do'os nazí'i le jaspe. Naca yödzö na' yení'ido' ca naca guió'j jara. ¹² Zoa tu zö'ö zxön, en sibi idú gásibi'ilö yödzö na'. Lè'e zö'ö na' nacué' chinnu gapa nu riyaza. Ra' gapa nu riyaza na' nacué' chinnuè' gubáz lá'ayi tapa chi'è. Tu tu ga nu riyaza na' nazúaj tu tu lágaca idxinnu cö' di'a dza zxí'ini xi'sóè' Israel. ¹³ Lè'e zö'ö le ruyú saca' ga rilén gubidza nacué' tsonna gapa nu riyaza, en saca' ga za' bö' ziaga nacué' tsonna gapa nu riyaza, en saca' tsölá'a ga ridödi gubidza beo' ziaga nacué' tsonna gapa nu riyaza, en saca' ga ribía gubidza nacué' ca' tsonna gapa nu riyaza. ¹⁴ Zxan zö'ö que yödzö na' nacué' chinnu xilibi zö'ö, ate' lè'egaca

xilibi zö'ö na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ruí'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca nácgaca gapa nu riyaza, en tsca naca zö'ö que. ¹⁶ Yödzö na', lédi'i nácgaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. ¹⁷ Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, lë na' ruríxinë' gubáz lá'ayi na'.

¹⁸ Zö'ö na' néquini guiöj jaspe, ate' yödzö na' néquini órotëz, le naca yení'ido' ca naca guiöj jara. ¹⁹ Yugu' xilibi zö'ö que yödzö na' nazí'gaca biquitaj guiöj nazáca'da'gaca.

Xilibi zö'ö zí'alö néquini guiöj jaspe.

Le buropi néquini guiöj zafiro.

Le bunni néquini guiöj ágata.

Le budapi néquini guiöj esmeralda.

²⁰ Le guyu' néquini guiöj ónice.

Le buzzopi néquini guiöj cornalina.

Le igadxi néquini guiöj crisólito.

Le izxunu' néquini guiöj berilo.

Le igá néquini guiöj topacio.

Le idxí néquini guiöj crisoprasa.

Le idxinéaj néquini guiöj jacinto.

Le idxinnu néquini guiöj amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá.

Luyú la' nōza lo que yōdzō na' néquini órotēz, le naca yení'ido' ca naca guiōj jara.

²² Biti' bilé'eda' tu yudo' lu yōdzō na', tu' náquië' Xanru' Dios yudo' que, napa cazē' idútē yōl-la' unná bē', en lēasca' caní náquië' Bōnni' náquië' Bō'cu' Zxíla'do', náquië' yudo' que yōdzō na'. ²³ Biti' run bayudxi tsení'gaca gubidza, en beo' lu yōdzō na', tu' uzení' yōl-la' bení' queë' Dios lu yōdzō na', ate' lēasca' Bōnni' náquië' Bō'cu' Zxíla'do' náquië' le uzení' ni'. ²⁴ Bōnachi yugu' yōdzō, nupa nulágaca, ila'dá lu bení' que yōdzō na', ate' yugu' bōnni' ta'nná bē'ë yōdzōlió idiguá'agaquië' yōl-la' tsahui' quégaquië' lu yōdzō na'. ²⁵ Catu caz tsáyajgaca gapa nu riyaza lu yōdzō na' lahui' dza, ate' lataj na' catu caz gaca rēla. ²⁶ Bōnachi yugu' yōdzō idiguá'agaquië' ni' le nácagaca lesaca', en yōl-la' tsahui' quéguequi. ²⁷ Tu le ruá' dō' bití' ca' tsaza ni', en calēga tu le naca xihui', en calēga nu rizi' yē', pero tsázagacasō ni' nupa nazúajgaca láguequi lu guichi queë' Bōnni' náquië' Bō'cu' Zxíla'do', ga na' nazúajgaca lágaca nupa nadéli'gaca yōl-la' na'bán.

22

¹ Ní'irō gubáz lá'ayi na' buluí'inē' neda' tu yegu yení'ido', le naca nisa yegu le runna yōl-la' na'bán. Rēpi yōsa bení' yegu na' ca rēpi yōsa bení' guiōj jara. Rirúaj yegu na' lu lataj lo ga rō'ë Dios, en ga rō'ë ca' Bōnni' náquië' Bō'cu' Zxíla'do'. ² Rizá' yegu ni gatsaj láhui'lō nōza lo que yōdzō na'. Tsölá'a huéaj ra' yegu na' rō'ō tu yaga le runna yōl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bōnachi yugu' yōdzō. ³ Biti' soa ni' nitú le dxía dō'.

Soa lu yödzo na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'. ⁴ Ila'lé'enë' lahuë' Lë', ate' le nazí'i Lë' nazúaj ra' xigágaquië'. ⁵ Biti' gaca rëla ni', ate' nupa nacua' ni' bití' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quegaquië'. Nupa nacua' ni' ila'nná bé'tica'sö.

Chizóa huödë' Cristo

⁶ Ní'irö gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para uluí'inë' yugu' huen dxin queë' le ral-la' gátatë. ⁷ Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxön. ⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. ¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'."

¹² Rnnë' Jesús: "¡Chizóa huöda'! Nu'a lu na'a le

nadéli'gaca bönachi, ate' ubi'a que queëguequi tsca naca le gulúngaca. ¹³ Neda' naca' Nu zoa zí'atëlö, enca' Nu röjsete, ca naca le risí lo, en le ruúdxité. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! ¹⁵ Nupa nácagaca xihuí', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guiöj budó' yaga, en nupa ta'yaza ládxi'gaca ta'zí yë' ila'cuá' ní'ilö ra' yödzö na'. ¹⁶ Neda', Jesús, gusöl-la'a gubáz lá'ayi quia', ate' buluí'në' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' xzí'ini xi'sóë'. Naca' ca' bölj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'aleni'-në' Bönni' náquië' Bö'cu' Zxíla'do', ta'nné': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizé ladxi' le, ral-la' guídi, en gu'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. ¹⁹ Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj queëguequi lu guichi ni.

²⁰ Xanru', Nu run ba nalí quéguequi lë ni rnnë':
“¡Ön! ¡Huödatea'!”
¡Ca' gaca! ¡Gudá, Xantu' Jesús!
²¹ Rinábida'-në' Xanru' Jesucristo uzá' ladxë'ë
queëli' yúgu'tëli'. ¡Ca' gaca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25